

故宮
珍本
纂刊

西

湖

志

第一冊
共二冊



故宮博物院編

海南出版社

故宮珍本叢刊第 264 冊史部地理類山水

故宮博物院編

西湖志

第一冊（共二冊）

海南出版社

蘇學堂

PDG

圖書在版編目(CIP)數據

故宮珍本叢刊.第264~265冊,地理·山水,西湖志/故宮博物院編.-影印本.-海口:海南出版社,2001.4

ISBN 7-80645-986-3

I.故… II.故… III.古籍-善本-故宮博物院-叢刊 IV.Z121.7

中國版本圖書館 CIP 數據核字(2001)第 06539 號

故宮珍本叢刊第 264 冊

史部·地理·山水

西湖志

第一冊(共二冊)

故宮博物院編

責任編輯:李升召

*

海南出版社出版發行

海南省海口市金盤開發區建設三橫路 2 號 郵政編碼:570216

湖南省新華印刷三廠印刷

湖南省長沙市韶山路 158 號 郵政編碼:410004

本書正文用紙由金城造紙(集團)有限責任公司生產

*

2001 年 6 月第 1 版 2001 年 6 月第 1 次印刷

開本:787×1092 毫米 1/16 印張:28 印數:1-400 冊

ISBN 7-80645-986-3/Z·67

定價:8400 元(河渠山水古迹游記外紀 96 種共 42 冊)

本書如有印裝質量方面問題請與我社或承印廠聯係

我社為本書每冊(種)書新編的目錄均置於每冊書末

西湖志序

國朝文獻堂

地雖勝而非有利於民有益於國家止足以供山人游客搜奇攬勝之資任封疆者不過而問焉至利於民而有益於國家矣而其地勿勝無往跡前事可考據則其名亦勿著杭之西湖近在郭門外出湧金錢塘清波三門昂首注目四山周遮水天一碧無登涉搜攬之煩而全湖之勝盪胸填膺高下在目六合之內不乏名勝求其與闌闌相接郭內外之民朝斯夕斯一舉足即食湖之利舉天下

西湖志

李序

名山川莫或與之媲也湖為百泉所潄雖早歲不竭杭屬仁和錢塘海寧三邑田畝皆資灌溉其下流並海而東

國家釐政歲兩掣舳艫銜尾會省門掣竟始散往各配食州縣其取道率由於此是則湖之有利於民有益於國家固大彰明較著者矣我

皇上御極之三年奉

命開濬西湖越歲而臣衛受任撫浙兼理釐政過所為西湖者淤泥菰葑充塞瀾漫問所為六橋兩堤及

其他古蹟則傾圮相望甚至莫能指目其處蒿櫓

無所用而舟人失業網罟無所施而漁子就閒傍湖之民無復有食湖之利者遑問田畝之資灌溉鮮艘之稱利涉哉於是集議開濬會釐司今光祿卿臣王鈞肩其任捐已貲以給工費期年而淤者通塞者去傾圮者整理之山重點翠湖再潑油彩鷁紅橋箭穿梳織加以蒔果栽花種魚養竹西湖名勝頓復舊觀夫而後田畝足資商艘有賴郭內外之民一舉足而仰事俯育不啻朝有掇而暮有

西湖志

李序

拾也

國家當全盛之時雲漢昭回生植暢遂山川草木各有鬱蔥向榮氣象此不特西湖為然而獨西湖艷人齒頰者由其地勝足以仰承天澤造物者亦特有以鍾之至於春之日秋之夕游人士庶歌咏太平悠游化日景物之間別具太和翔洽之致則自唐宋元明以來湖之盛未有過於今日者矣恭惟聖祖仁皇帝五次省方周諮民隱獨肆赦

湛恩汪濊守土諸臣建

行宮於湖上間間無絲粟費而瞻雲就日之思愈久而

不能忘

皇上俯順輿情改為

聖因寺虔奉

御牌以慰民望他若湖山廟丁家山金碧照耀南北映帶

又皆唐宋元明以來所未闢之境而創自今日者

會城文武僚屬遇歲朝長至或初履任及他省仕

宦道經武林必相率詣

聖因寺瞻叩

西湖志

李序

三

聖祖神御龍牌通省士民熟聞習見於以發其尊君親上

之心是又教化之所由興其為利益於民於

國家者又豈獨田畝之灌溉商艘之利涉已哉湖舊

有志以遊覽名此特山人游客搜奇攬勝之所取

於國計民生夫豈有當因修通志之餘纂緝斯編

詳溯源流分別門類而附以典故詞章俾後之任

斯土者知湖之有利於民有益於

國家以無負

聖天子命加疏濬之盛心至歲修之資則有

臣衛經理

時光祿所捐置田畝在收其入以時葺治之事易

集而公私固無擾也梓成謹識其緣起如此

雍正十二年暢月之吉

欽命太子少保兵部尚書總督直隸等處地方管轄紫

荊密雲等關隘贊理軍務管理糧餉兼都察院右

副都御史前浙江總督管巡撫事兼理蟻政節制

江南

臣李衛謹序

西湖志

李序

四

西湖志序

西湖志前督臣李衛因修浙通志而及之首水利次名勝因水利而及隄塘堰牐橋梁因名勝而及山水寺觀園亭祠宇古蹟藝文旁及志餘外紀凡四十八卷臣元章至浙三年鏤板始成謹序之曰浙會城以江海為門戶而西湖其堂奧也是故西湖之水重與江海埒考厥所繇雖地則然顧不以時哉明聖靈驚始見於漢晉間不甚顯至唐宋始大著然興廢亦屢矣我

西湖志

程序

聖祖仁皇帝五章其土

天章御製以褒揚寵命之我

皇上特諭興修以紹大功而後溥博閎麗超歷朝而垂萬世地猶是也惟遇重熙累洽太平極盛之時以至於此人見湖水之蓄洩通漕鹽以利

國溉田供汲以利民濟舟楫以利商旅而知

九重之軫念深而睿慮周也人見草木禽魚之蕃庶與

馬權槩之絡繹而知

聖澤之淪浹於民久樂樂而利利也人見法王之宮名賢

之宇高士之廬輪奐鳥翬瞻仰恐後而知

盛世之民嚮化慕善風淳俗厚感天和而饒物力也於焉志之

帝德於以昭天心地力於以彰人風於以傳故今之志宜什伯於前志之美者非美於其紀載而美於其所紀載者也夫西湖天下所在有之而杭獨著者豐於水者蓄於山此則環山為岸行於水者沮於陸此則堤亘梁接水放於荒遠寥闊而此則麗於城郭錯於園廛水虞其波濤湍悍而此則淨如練

西湖志

程序

平如鑑其源不涸其流不辱其土宜種植其風氣藏聚其水清甘曩哲所云天造地設者也是以度越諸川而擅名於世蓋九百七十餘年匪今斯今矣而臣謂繫於時者白蘇趙楊諸臣狀奏題請幾至廢格以幸有成績豈若洞自

宸衷渙汗出綸之易吳越南宋割據偏安以訓繁華揚盛美豈若

一統版章

巡狩省方之大遊宦過賓之歌吟毫札豈若

天語之崇山人仙釋所棲托豈若

神御之尊名人之題額碑版豈若

宸翰之貴九百餘年以來兼之者有之乎無之也故曰

惟今之時為然且夫志水者詮其利志地者標其

勝自昔已然然而葑田菱蕩水簾桑埂未嘗不數

開其利而掩其勝今自

翠華臨幸以來四十年於茲湖之內水益浚而深堤益培

而廣寺益拓而新祠廟益增而麗卉木益時而滋

湖之外渠益通而流田益溉而腴

西湖志

程序

三

聖天子矚懷於上士庶農女歡悅誠敬於下封疆大吏

帥其僚屬以仰體優憫因利踵事歲繼月繩相積

於永永則是湖之沛恩波流惠澤者億萬年無疆

而是志也傳世行遠亦立言於不朽可徵也

臣樂

觀厥成颺言於策與有榮幸矣

雍正甲寅重九日

賜進士及第總督浙江等處地方軍務兼理糧餉管理

巡撫事務并兩浙鹽政兵部右侍郎兼都察院右

副都御史臣程元章謹序

西湖志序

粵自河渠有書溝洫有志歷代史氏於水利多詳

言之而山川之形勝景物之繁昌亦備著焉凡以

水利之繫於國計民生者甚鉅而求端竟委所以

資考鏡備掌故者誠不容以或略也欽惟我

皇上法天因地宵旰勤民

御極之始即大興水利肇自西北爰及東南

特念浙江西湖有關農田漕運

敕督撫會勘發給重帑大加濬治維時方勦興

西湖志

王序

一

畿輔營田臣紘蒙

恩擢任清河道凡溝澮川涂之事潛防均寫之宜一皆

稟承

睿訓悉力奉行於是隰臯沃衍繡錯綺分然後知水之

為利如是其溥且博而

王政所先為典有甚鉅也嗣蒙量移浙藩職司旬宣因

得周覽浙西上下見水之自外至者宜防其患莫

如錢江水之自內出者實資其利莫如西湖蓋江

與湖相為表裏而江水不至之處皆湖水之所灌

輸苟湮淤阻塞爲患有甚於江湖衝激者矣自疏濬以來緣江數邑之田歲屢有秋而鹽漕轉輸商賈輻輳公私利賴其明效大驗彰彰若是不有記載奚以恭紀

聖恩而昭示永久會奉纂通志校閱之餘適前督臣以新修西湖志一編屬爲訂定因受而卒業見其首紀水利一門詳志

聖朝軫念民瘼興利萬世之至意而於歷代興廢之由亦三致意焉其他若隄塘堰牐橋梁筧壩之屬亦

西湖志

王序

二

莫不條分縷晰按部就班大約取明田汝成舊志而損益之訂其闕失汰其繁冗若領之在綱鉅細不遺與史臣書河渠志溝洫之意若出一轍可謂知所本務矣伏念西湖自

聖祖仁皇帝省方駐蹕以來德澤普民物雍熙已極千古未有之盛事茲復蒙疏濬山川効靈獻奇呈秀風景日新開億萬年太平之象臣於治事之暇間一至其地覽山川之形勝觀景物之繁昌未嘗不流連洄溯歎爲宇內之大觀而益信是編之記載

爲不容略也剗剗未竣即奉有巡撫皖江之

命遙望西湖渺不可即猶得於是編一展卷間而水光山色如在几席抑何幸歟以忝與校讐之末例得颺言簡端且臣曾任水利專官而於藩宣浙水諸大政亦深見其未有重於此事者故特舉西湖水利之大端謹拜手稽首而識諸末簡

賜同進士出身

誥授通奉大夫巡撫安徽等處地方提督軍務都察院

右副都御史前浙江布政使司布政使臣王紘謹

西湖志

王序

三

撰

西湖志序

寰海之內以西湖名者三十有一處而錢塘之金牛湖特著謂是溪澗之渟泓林麓之窈窕佛圖仙觀之眇青眇碧足以侈遊觀歸登眺而已乎蓋其地當四山之下注演迤清澄長輪而遠達設板置牖以時其鍾洩下邑之田藉以灌浸凡數千百頃故言浙西水利者此焉為大洪惟

聖祖仁皇帝省方南幸湖千屢邀

駐蹕名勝所在

西湖志

張序

錫以歌咏

天章璀璨照耀寰區兩峰若加而高三潭若濬而深草木向榮皆有欣欣之色臣民謳思無已恭建

行宮於上我

皇上即位之六年

特允督臣李衛之請改為佛寺

御書聖因寺額虔奉

聖祖龍牌神御使臣民得以敬謹瞻禮以慰其愛戴之思是則兩浙之被

恩較他省為尤渥也前此我

皇上特頒

諭旨軫念浙民之疾苦開濬西湖以興水利於是前督臣衛鹽道臣王鈞相欽協助濶泥芟葑清民田之佃佔者湖面砥平頓還舊觀於是下田屢獲豐稔方春之初天竺香市以香帛來祈報者熙熙攘攘輻輳於兩堤之間翺翔化日之舒長歌咏太平之景象督臣衛又於宋時十景之外增飾一十有八處以成名勝之大觀而守土之吏亦得以時沿湍瀨溯淵潭益穆然想我

西湖志

張序

二

聖天子湛恩之汪濊焉撫松杉蔭花柳益穆然想我聖天子厚德之栽培焉觸目而警於心根心而施之政可以勵官常可以敦臣節可以當牧民之寶鑑矧夫功德之坊勲賢之祠清風亮節之廟貌櫛比鱗次觀感而觸發於以興民行而育民德實在於是然則西湖志之作烏容已哉前督臣衛創有成書發凡緣起其例已具臣不敏前司鹽筴近任旬宣獲與校讐之役因刊成而識其大概若此使守此

土者得以鑒焉

浙江等處承宣布政使司布政使前鹽驛水利道

副使臣張若震謹撰

西湖志

張序

三

西湖志序

浙爲國負海而抱江水利所在徧郡縣然其陂澤
瀦浸大者有三在浙西者爲杭州之西湖在浙東
者爲越州之鑑湖明州之東湖考西湖本名錢唐
湖與鑑湖並著於漢代名勝甲於東南而唐宋以
來天下又競稱西湖自名公卿賢士大夫下逮芸
夫牧豎無論至與不至皆流連愛慕津津齒頰豈
徒以水光山色足供游覽之娛而已哉凡以蓄洩
灌漑利益於國計民生者有甚大也恭遇

西湖志

顧序

聖祖仁皇帝省方南巡嘗五次駐蹕以故其地益重而山
川之靈淑景物之繁華尤爲自古以來未有之盛
歲丁未臣奉

簡命出守會稽得縱觀鑑湖千巖萬壑之勝及考舊牒
知東漢太守馬臻實開湮淤通渠閘使民得世享
其利則未嘗不嘆古良吏若史起姜師度邾璆諸
人率所至輒興修水澤之利皆所以爲稼穡計也
繼而攝篆四明又見東湖之有關農事與鑑湖同
故先後皆嘗親詣原隰相度泉流以時疏濬由是

瀕兩湖而田者歲歲有秋然豈若西湖之水利尤有裨於國計民生也哉越甲寅仰荷

聖恩擢任兩浙鹽使遂來杭州間以公事往來湖上察其停匯之源宣洩之所不特負郭兩邑及鹽官數萬頃之田資其灌溉即省城內外上下兩塘諸運河皆藉以灌輸而鹽司掣運所係尤重然則西湖之利可謂溥矣我

皇帝御極之二年

特飭督撫會勘定議動帑疏濬以故源益深而流益廣

西湖志

顧序

二

蓄洩以時旱潦有備洵足垂利萬世至於山翠如螺波澄若鏡樓臺亭榭繡錯綺分而環湖松篁蒼蔚雲風週遮樵唱漁歌與波而上下無一不足以徵

聖朝深仁厚澤太和翔洽之象匪僅供詞人騁客選勝探奇已也前督臣李衛博採舊聞搜羅掌故重修西湖志條次詳整編敘醇雅一披覽而湖中景物與古今著述無美不收有非田氏舊志所可比繫者西湖固天下名區而唐宋以來又多賢牧守如

李泌白居易蘇軾則其最著皆嘗開濬以垂功德於民而況

聖天子宵旰勤民經營疏治其規模度越前代有出於萬萬者則敬謹記載誠不容以或略也臣愧不文不獲與鉛槧之末顧猶得於志之成也恭誌一言以附名簡末抑何幸歟謹懽忭踴躍而為之序雍正乙卯二月花朝前一日

總理兩浙江南等處都轉運鹽使司兼管浙江清軍驛傳水利事務鹽驛道副使臣顧濟美謹撰

西湖志

顧序

三

西湖志序

浙東西包絡山川而省會之地西湖擅其勝湖近據城闌崇岡疊嶽自天目東來蜿蜿壇壇融結凝聚淳瀟秀液故歷唐宋以還人物之盛麗井邑之雄富甲乎東南而賢達勝士磊落代興傑構貞珉後先輝映宇內談名勝者多艷稱之則夫傳勝事於武林探奇踪於靈竺斯亦徵文考獻者所必及也明嘉靖中田副使汝成嘗作西湖遊覽志撰勝撫言頗資揚扆然詮綜前聞猶或簡略不免議者

西湖志

郝序

遂有星一漏十之譏顧自田志後百餘年來無繼

作者恭逢

皇上御極之七年

詔天下各修省志於時海宇清晏閭閻澤沾濡杭民既富

完安樂而西湖適當奉

命開濬之後百廢具舉前督臣李衛爰即編輯浙省通

志之餘兼及湖志慎選名俊博徵載籍搜考叅稽

閱一載而卒業歲甲寅臣奉

簡命總制閩浙忝荷重寄底屬不遑未暇一攬湖山之

勝今年春由海道巡歷至浙爰周覽浙東西山川

形勢舉凡土田之高下原隰之縱橫與夫陂塘堰

埭瀦防蓄洩之宜莫不賅於目而識於心然後知

西湖蘊靈毓粹蠲潔停深形勝關乎郡城灌漑資

夫旁邑非僅為游覽之地已也竊嘗率賓佐僚吏

沿湖湖中恭謁

聖祖仁皇帝神御龍牌伏觀當年

翠華南幸

睿藻留題為萬古不泯之勝蹟我

西湖志

郝序

皇上宸翰屢頒

天章炳煥照耀湖山迴巒若增而益高澄波若浚而益

深四時風景月異歲新太和翔洽之象溢於目睫

洵宇宙之大觀而昇平之勝槩也會新志剏闕既

竣治事之餘輒一流覽見其文質相宣繁簡合度

分門別類比事屬詞體例一準於通志為門二十

為卷四十有八首紀水利昭

聖朝經制之周詳遞述名勝見熙時景物之韶令記山

川則標敘脈絡傳人物則昭紀鴻懿物產徵品彙

之繁古蹟景前賢之範祠宇可觀考時地而察廢興隄塘橋梁審修建而知治理旁及碑版之作金石之文莫不遐蒐遠討州次部居傳述悉本舊聞徵引各標書目以言乎詳則不支以言乎贍則不穢以言乎采獲則備矣臣不文雖未及握槩懷鉛躬與讎比而獲觀是書之成颺言簡端以導揚美盛歌咏太平抑何幸歟爰標舉梗概而爲之序

雍正十三年端月之吉

兵部尚書總督福建浙江等處地方軍務兼理糧

西湖志

郝序

三

餉兼都察院右副都御史拜他喇布勒哈番加八

級紀錄三十八次功加一等臣郝玉麟謹撰

西湖志序

西湖古稱明聖湖見於酈道元水經注而考其所以稱名之故則以漢時金牛見湖神化不測遂以爲名唐宋至今咸仍其說夫山川靈淑之氣必遇聖明之世始能宣著發越以鍾洩其奇而聖明之時又必有名山大川獻奇呈秀以成宇宙昇平之象蓋理有相因而時有適合故由今日以觀西湖然後知昔稱明聖之故蓋在此不在彼也而或者謂自有西湖以來其間通塞興廢之故亦屢更矣乃明聖之號肇於數千百年之前而明聖之徵獨驗於今日何歟蓋

西湖志

吳序

一

國家重熙累洽海宇清寧凡域中名山大川莫不獻奇呈秀風景日新而西湖又適當奉

命疏濬之後仁恩霑霽萬彙昭蘇正山川靈淑之氣所藉以宣著發越之候也而豈數千百年以前或通或塞忽廢忽興者所可同日而語耶伏惟康熙四十四年臣父開圻以右榜及第進士任杭協水師副將恭遇

聖祖仁皇帝省方南巡臨幸湖上維時臣民方踴躍忭舞

創建

行宮凡湖隄花柳與夫巖桂渚蓮之屬皆出先臣經理

手自栽植紛紅駭綠掩映湖山爲前此未有至今

父老猶有能道其事者雍正六年臣進義亦由台

協副將調任杭州適嗣先臣舊職會道臣王鈞方

奉

命開濬西湖前督臣李衛擘畫指授大加增葺無廢不

興無墜臣不舉於是時奉令董理躬親其事後膺

西湖志

吳序

二

簡命陞授黃巖總兵官去浙西將千里遙望西湖時時

眷懷不置適督臣衛於纂輯通志之餘別成西湖

志一編薈萃前聞徵據時事據文考獻鉅細不遺

剴劂既竣讀之水光山色如在目睫以是知

聖明之時必有名山大川獻奇呈秀以成宇宙昇平之

象者於斯可見矣臣職忝戎行未獲躬操觚翰竊

與校讎之列第追憶先臣於役湖濱而臣亦得躬

逢盛舉稍竭微勞何幸如之故推原自昔稱名之

故其適符於今日者如此恭誌一言於末簡以附

名不朽云

雍正乙卯歲夏四月之朔吉鎮守浙江紹台等處

總兵官臣吳進義敬撰

西湖志

吳序

三

西湖志

凡例

一字內名山大川莫不有志要以補郡縣志所未備也西湖名勝甲於東南而宋元以前未有專志明嘉靖間提學副使田汝成始創爲之名遊覽志考漢時金牛見湖瑞應明聖而湖流蓄洩實資灌溉田疇濟民食而通運道故言兩浙水利者輒及西湖豈直爲遊覽之地已耶顧歷代以來舉廢不一國朝鼎興重熙累洽恭逢

西湖志

凡例

聖祖仁皇帝軫念蒼黎屢舉省方之典

巡幸至浙駐蹕湖山明聖之瑞昭然千古雍正二年我

皇上特因西湖水利切繫民生

命督撫會勘大加疏濬由是浙西年穀順成人文蔚起

舟航輻湊居民利賴無窮而湖山景色亦復粲然

改觀成億萬年太平之象非敬謹紀述奚以昭示

來茲而垂永久會奉

敕纂修通志鉛槧之餘爰取田志重加釐訂悉準通志

之例分門記載另爲一編凡郡邑志所未備者俱

詳見於此

一田汝成舊志止爲遊覽而作故總敘之外不分門類但依遊歷所經蟬聯詮次凡山水隄塘橋梁寺觀之屬夾雜登載雖別出新裁而未合志體今分列各門而於各門之中仍分五路曰孤山路曰南山路曰北山路曰吳山路曰西溪路依路順敘庶便覽觀

一西湖代有疏濬而水利之議莫詳於宋蘇軾明楊孟瑛二疏然宋僅用常平減價餘米及度牒之費

西湖志

凡例

明備夫一百五十二日爲值僅二萬有奇資用少則功力薄歷歲漸遠復致湮淤我

皇上念切民依特重水利凡有興作皆不惜重帑以成

經久之圖故開濬以來湖面深廣支流暢達復留

羨資置額田以供歲修誠萬世無疆之利也謹詳

載水利備列開濬事宜以志

聖澤之汪濊云

一西湖名勝自宋時即有十景之目而湮廢日久舊

志亦已失載康熙三十八年

聖祖仁皇帝臨幸西湖

親灑宸翰分題十景龍翔鳳翥輝映湖山而西湖名勝始

昭垂於天壤之間由是山川煥采日異歲新隨處

皆成麗境撮奇標勝形諸繪事共爲四十圖各系

一說並綴古今題咏以供全覽

一西湖負郭環山脈絡聯貫瀕江帶河支流四達故

凡城內城外上河下河以及大江西溪均屬西湖

山水悉依舊志登載

一湖水惟恃陂塘潴洩而後旱潦有備如白居易之

西湖志 凡例

三

梵石笕蘇軾之築長堤皆爲潴洩計也有陂塘則

有橋梁有堰閘均以次類及

一通志園亭俱列入古蹟惟西湖園亭多係

國朝初建崇奉

天章即前人遺構亦現今增葺規制重新皆足潤色湖

山開拓風景故專志園亭一門若古有今無名存

實廢者仍載入古蹟

一西湖琳宮梵剎遠近相望惟雲林天竺淨慈諸處

屢奉

聖祖仁皇帝翠華臨幸恩普招提自宜敬謹記載至

行宮駐蹕之地浙民愛戴無窮慕思彌切願請改旌

佛寺朝夕焚香祝頌

御書聖因寺額虔供

聖祖神御龍牌俾萬世臣民永永瞻仰謹列於寺觀之首

一崇德報功莫重於祀典西湖地居省會凡有功德

在民者輒建祠其上蓋其地靈斯爲神所憑依宋

人有配食水仙王之句義取此也故凡有合於祀

典者悉爲登載非是勿錄

西湖志 凡例

四

一古人遺蹟至今尚存者俱分見各門惟時地已易

而踪跡全湮或基址雖存而稱名已別者所當搜

討以寄懷古之思

一名區勝境必待人而後顯果其人功業文章足爲

湖山增重則不必盡屬浙人自當與西湖並垂不

朽至遷客騷人縉流羽士亦例得並載

一陂塘蒲葦之入昔人每詳言之蓋天地自然之利

不可不知所以搏節愛養之也西湖一隅水鄉雖

無奇珍異錯而通都大邑之所產靡不畢具由是

居湖小民得以經營負販而自贍衣食夫孰非因民而利之之道耶故志及之凡昔人形諸歌咏者亦採摭焉

一名流詞翰既壽金石而龜趺蟲篆苔封塵翳者不少搜討及之以見前人深意之所在云

一學士操觚多託名山以傳不朽故有專爲西湖撰述者雖卷帙單行亦足備湖山掌故特存其篇目注明卷數并詳撰人姓氏爵里以備考索其不專屬西湖者載之

西湖志

凡例

五

一法書名畫總爲西湖設色寫真第零繼斷素如過眼煙雲每多散佚止就觀記所及者錄存其槩一藝文有專屬者自宜分隸各門以合比事屬詞之義其概論湖山之勝而無所附麗者則統爲藝文志分別各體以時代爲詮次若鴻篇鉅製各體不及盡收亦得併入第名作如林蒐羅未廣於膾炙人口中擇其尤雅者登之

一自匡韓說詩而後世有詩話之作宋許顗云詩話者所以備古今記盛德錄異事証訛誤也西湖記

載大抵不出篇什而事往風微指歸莫定則詩話尚焉故撰次於藝文之後

一田汝成舊志於遊覽志之外別有志餘二十六卷每卷各標一目選搜博討可謂勤矣雖其自敘云多述游冶之談非長化者所取然徵文徵獻存什一於千百亦載筆者之職也取其足資考鏡垂勸戒者亟登一二而仍其名曰志餘所謂裁剪之遺兼收並蓄者也或事不涉西湖而爲舊志所錄者別入外紀以資閱覽

西湖志

凡例

六